



Pelan Liberalisasi Visa: 5 inisiatif tambah baik kemudahan imigresen mulai 1 Disember

Oleh Suraya Ali - November 27, 2023 @ 6:12pm

suraya.ali@bh.com.my

KUALA LUMPUR: Kementerian Dalam Negeri (KDN) bakal memperkenalkan lima inisiatif utama bagi penambahbaikan kemudahan imigresen bawah Pelan Liberalisasi Visa, mulai 1 Disember depan.

Menterinya, Datuk Seri Saifuddin Nasution Ismail, berkata ia bagi melakukan anjakan dasar dan memperkenalkan pendekatan baharu mengikut tuntutan semasa.

Beliau berkata, Pelan Liberalisasi Visa bertujuan menjana hasil pendapatan negara dan akan dilaksanakan dengan penambahbaikan kemudahan imigresen sedia ada yang telah dinikmati pengembara ke Malaysia, termasuk dari Eropah, Asia Tenggara, Timur Tengah dan Asia Barat.

"Pengecualian visa selama 30 hari kepada rakyat China dan India ke Malaysia, yang diumumkan Perdana Menteri, Datuk Seri Anwar Ibrahim, adalah salah satu inisiatif bawah pelan itu," katanya dalam satu kenyataan, hari ini.

Saifuddin Nasution berkata, pemberian pengecualian visa bagi tempoh 30 hari kepada warganegara China dan India, akan bermula 1 Disember 2023 hingga 31 Disember 2024.

Inisiatif seterusnya ialah pemberian kemudahan 'Multiple Entry Visa' (MEV) bagi tempoh hingga 30 hari kepada semua pelancong yang ingin masuk ke Malaysia.

Seterusnya, pemberian Pas Lawatan Sosial (Jangka Panjang) dengan keberadaan hingga 12 bulan untuk pelajar antarabangsa yang telah tamat pengajian di Malaysia, bagi tujuan menyambung pengajian, melancong dan bekerja secara sambilan dalam sektor pekerjaan yang dibenarkan mengikut undang-undang di dalam negara.

"Inisiatif pemberian Pas Lawatan Sosial (Jangka Panjang) ini dibuka kepada 23 warganegara yang berisiko rendah dan berpendapatan tinggi, iaitu Australia, New Zealand, Brunei, Singapura, Korea Selatan, Jepun, Jerman, United Kingdom, Perancis, Kanada, Switzerland, Belanda, Arab Saudi, Kuwait, Emiriah Arab Bersatu (UAE), Qatar, Oman, Bahrain, Sweden, Norway, Denmark, Finland serta Amerika Syarikat," katanya.

Inisiatif lain ialah pemberian visa transit umrah bagi tempoh tujuh hari melalui agensi pengendali umrah berdaftar bawah Kementerian Pelancongan, Seni dan Budaya (MOTAC).

Di samping itu, penambahbaikan tempoh sah laku visa dipanjangkan daripada tiga bulan kepada enam bulan, dan tempoh kelayakan Pas Lawatan Sosial diselaraskan kepada minimum 30 hari bagi semua negara yang memerlukan visa untuk masuk ke Malaysia.

Saifuddin Nasution berkata, Bank Negara Malaysia (BNM) melaporkan aktiviti pelancongan adalah satu daripada tiga faktor utama yang memacu pertumbuhan ekonomi negara bagi 2023, dan dijangka terus meningkat serta menyumbang secara konsisten kepada pendapatan negara.